

Uunga siunnersuut: Qalerallit avaleraasartuullu avataasiorluni aalisarnermi pisarineqartut akitsuutaat pillugit Inatsisartut inatsisaata allanngortinneqarnera pillugu Inatsisartut inatsisaat nr. XX, XX. XXX 2014-imeersoq

Saqqummiussissut

(Aningaasaqarnermut Nunamullu Namminermt Naalakkersuisoq)

Siullermeerneqarnera

Qalerallit avaleraasartuullu avataasiorluni aalisarnermi pisarineqartut akitsuutaat pillugit Inatsisartut inatsisaata allanngortinneqarnissaa pillugu Inatsisartut inatsisissaattut siunnersuut, qalerallit suliarineqanngitsut immannguaannarlu suliarineqarsimasut annissorneqarneranni akitsuuserneqartalernissaannik siunnersuummik imaqartoq Naalakkersuisut sinnerlugit matumuna saqqummiutissavara.

Inatsisissatut siunnersuut, qalerallit sinerissap qanittuani pisarineqarsimasut ”Japan cut” atorlugu suliareqqaarneqarsimannikkaangata pisuussutinut akitsuuserneqartalernissaannik imaqartumik Naalakkersuisut 2014-imi inatsisissamik siunnersuusioqqullugit peqquneqarnissaannik Inatsisartut aalajangiiffigisassaattut siunnersuutip UKA2013/27-ip Inatsisartunit akusissutigineqarnera tunngavigalugu saqqummiunneqarpoq.

Pisuussutinik akitsuusiisalernissamik nutarterineq ingerlanneqarpoq 2014-imili piareerneqarnaviarani. Qalerallit suliareqqaarneqarsimannikkaangata akitsuuserneqartalernissaannik siunnersuummik 2014-imi saqqummiussinissaq pillugu aalajangiineq naammassiumallugu siunnersuut una suliarineqarpoq.

Inatsisissatut siunnersuutip kingunerissavaa suliffeqarfiit inuillu qaleralinnik Kalaallit Nunaanniit annissuisut, qalerallit suliarineqanngitsut imaluunniit suliarineqarlutik niaqui papearuiluunniit suli atasut anninnerini landskarsimut akitsuummik akiliisalernissaat.

Akitsuutip qalerallit pisarineqartut akitsuutaattut maanna atuuttutut angissuseqassaaq, tassa imaappoq qaleralimmut anninneqartumut kiilumut 2,50 koruunit missingat, taannalu ukiumoortumik aaqqinneqartassaaq.

Qaleralinnik annissuinermt akitsuutip taamaattup kingunerisaanik nunatsinni suliffissat amerlinissaat neriuutigineqarpoq, nunanummi allanut nioqqutissiortut qalerallit Kalaallit Nunaanni suliarisarnissaat akitsuutip kingunerisaanik orniginerulissammassuk.

Akitsuuteqaraluartorli nunanut allanut nioqqutissiortut aalisakkanik suliarineqanngitsunik annissuinissaq ingerlatiinnarusunnerusinnaavaat. Taamaassappat akitsuut tamatumunnga taarsuullugu landskarsimut isertitsissutaassaaq.

Kilisaatit tunisassiorfiutigisut siunnersuutip kingunerisaanik, qalerallit pisarineqartut akitsuutaasa saniatigut qalerallit annissornerannut akitsuummik akiliisussanngorlugit marloriaammik akitsuusiiffigineqassanngillat, siunnersuutimmi kingunerissammagu suliffeqarfiit inuillu qale-

rallit pisamik akitsuutaata saniatigut aamma annissuinermi akitsuummik akiliisussaanningnerat.

Inatsisissatut siunnersuut tassungalu oqaaseqatit naggataatigut innersuussutigaaqka.

Siunnersuut Naalackersuisut sinnerlugit matumuuna Inatsisartunut suliassangortippara, aammalu Aningaasaqarnermut Akileraartarnermullu Ataatsimiititaliami suliarineqareerpat aappassaaniigassangortillugu.